

Erich Bolinius

www.erichbolinius.de

Erich.Bolinus@t-online.de

Bericht über den BSV Kickers Emden - Sendung „Flutlicht“ auf Radio Ostfriesland

Donnerstag, 23.8.2012 18.05 Uhr auf 94.0 bzw. 87,7

Moin, leev Toehörers,

ruugweg 400 Toekiekers belevten lesd Sönndag bi 35 Grad Hitz een heel un dall verrückte „Saunaspöl“ in Loga tüsken de Mannskuppen van Frisia Loga un Kickers Emden. Eenige van de Spölers kunnen mit de Hitz neet so recht umgahn. So harr de Szene in de 85. Menüte mit Foetball nix mehr toe doen. As na ´n Gewöhl glik 4 Spölers an Grund gungen, hett Emdens Ofwehrspöler **Manuel Menzel** de Frisia-Spöler **Yannick Haase** in de Unnerarm beten.

Dorför kreg de Kickersspöler van de Schiri **Hendrik Patrong** ut Meppen de rood Kaart.

Man de Schiri kann dat gaar neet sehn hebben, dat hett de Frisia Spöler sülvst seggt. Worum hett Menzel aber toe beten? Menzel hett seggt, dat hum de Frisia-Spöler in d` Sweetkasten nohmen hett, he harr Panik kregen un sük neet anners wehren kunnt, as toe toe bieten, dormit hum de Spöler löß leet.

Dat was van beid Spölers neet up Stee. Dat aber de Schiri blot de Emden de rood Kaart geven hett, was ok neet in Rieg. Wenn beid Spölers ´n geel Kaart kregen harr, was dat up Stee west, meen neet blot ik.

So was Kickers toe disse Tiedpunkt blot noch mit 9 Spölers up Platz, wall Kickersspöler **Christopher Appeldoorn** al na 120 Sekunnen na sien Inwesseln na ´n „Noodbrems“ de rood Kaart sehn harr. Sogaar Logas **Trainer Brinkmann** see na dat Spöl, dat de rood Kaart neet in Rieg was. Man dorvör kunnen sük de Spöler un de Mannskupp ok nix mehr van kopen. De Schiri harr anskienend neet de richtige Brill up, of de was dör dat Saunaweer beslaan.

Bi de rood Kaart för Appeldoorn lagg Kickers al 0:2 toerügg.

Loga was in de 33. Menüte dör ´n Drömtor van **Timur** un in de 43. Menüte dör ´n Koppball van **Stolz** in Föhren gahn.

Eenige Kickersfans harren do van dat Spöl un van de Hitz genug un hebben sük up de Rügghfahrt na Emden maakt. Ok de Kickersfan Stefan ut Borssum, de mien Jung per Telefon immer weer over de Spölverloop informeert hett, harr de Nös full.

Man de, de ut Loga ofhauen sünd, de hebben wat versümt. Dat wurr ja noch heel spannend.

In Unnertahl kwamm Kickers Emden up maal immer beter in Fahrt. Mit twee herrelke Koppballtoren dör **Martin Habben** in de 52. un in de 62. Menüte gleek Kickers ut. Man dat hulp all nix. Na de rood Kaart van Manuel Menzel in de 85. Menüte kwamm Loga dör **Heijenga** in de 89. Menüte doch noch toe dat Siegtor.

Dat harr de jung Kickersmannskupp neet verdeent, meen neet blot ik. Man so grausaam kann Foetball wesen.

Dat overhoopt spölt worden is, kann ik neet verstahn. Ik fraag mi, mutt eerst ´n Spöler dood umfallen, bit de Funktionären begriepen, dat man bi 35 Grad Hitz neet Foetballspölen sullte? Hopentlik denken de, de de Verantwoorden hebben, dorover maal na.

Sönndag geiht dat nu tegen de VFL Oyhte, de hör beid Spölen wunnen hebben. Ik hoop un löv doran, dat sük de Kickersmannskupp bit dorhen van dat verlorene Spöl tegen Loga erhaalt hett.

Ik will Moderator Berthold Janssen sien „Standartipp“ neet wegnehmen, Tipp dorum up ´n 3:2 Sieg för Kickers Emden.

So, nu noch, as alltied, `n heel kört Foetballwitz.

Een Foetballer hett grottenschlecht spölt, skufft aber de hele Skuld up de Schiedsrichter. In de Kabine meent he toe d` Trainer: „De Keerl trapp ik in de Mors!“ – „Laat man goed wesen“, seggt de Trainer, „de deist du vandaag ok neet treffen.“

Leev Toehörers van Radio Oostfreesland,

dat was dat weer maal för disse Week,

ik hoop, Joe hett dat Plattdütsk gefallen, denn mien Motto heet ja alltied,
plattdütsk dürt - nettso as Kickers Emden – neet unnergahn.

Bit anner Maal

Joe

Erich Bolinius

ut Emden-Petjem.